



## **Actividades de apoio da unidade 13. Formación, evolución e final dos bloques. Os conflitos nun mundo bipolar.**

Estas actividades serven para axudarche a reforzar os contidos mínimos despois de realizar o cuestionario correspondente a esta unidade 13. Son 15 cuestións estruturadas en 3 apartados de 5 cada un: repasar conceptos, elaborar un texto histórico a partir de 3 conceptos e relacionar informacións.

### **A). Repasando conceptos**

- 1) Que significa o termo de Guerra Fría?
- 2) Qué foi o principio de contención de Truman?
- 3) Que significa a coexistencia pacífica e cando se da?
- 4) Que é o movemento dos países non aliñados?
- 5) Que é a *Ostpolitik*?

### **B) Elaborar un pequeno texto que teña rigor histórico e lingüístico cos seguintes conceptos:**

- 1) Telón de acero – Guerra fría- Mundo bipolar
- 2) - Plan Marshall - Atlantismo – Zona occidente de Alemaña
- 3) OTAN – Forza nuclear – Carta da ONU
- 4) Guerra de Corea- Paralelo 38º- Política de contención
- 5) Política de “Nova Fronteira”- Carreira de armamentos- Acordos SALT 1

### **C) Indicar concepto, país ou persoa á que se refiren as seguintes frases:**

- 1) Da Segunda Guerra Mundial saíu moi engrandecida e os seus dirixentes iniciaron un proceso para facer da súa zona de ocupación en Europa unha única rexión integrada:
- 2) A formación dun estado alemán occidental logrouse nos acordos de Londres en 1948 entre as tres potencias ocupantes:

- 3) Kruschev propuxo converter a Berlín en cidade libre desmilitarizada rexeitada polos occidentais e a República democrática para frear o éxodo masivo cara ao Oeste en 1961 respondeu levantando:
- 4) Estados Unidos consideraba que en Vietnam se xogaba a carta da expansión do comunismo internacional representado polo movemento guerrilleiro:
- 5) A comezos dos anos 70 as dúas superpotencias perderon influencia e ademais habería que ter en conta agora os seguintes países:

## **Respostas ás actividades de apoio da unidade 13.**

### **A) Repasando conceptos**

#### **1) Que significa o termo de Guerra Fría?**

É un termo de orixe americana que se aplicou ás relacións internacionais da posguerra entre 1947 e a década de 1990 baseadas na tensión entre os dous bloques, o bloque capitalista liderado por Estados Unidos e o bloque comunista liderado pola Unión Soviética. Significa confrontación pero sen recorrer a enfrontamentos armados directos.

#### **2) Qué foi o principio de contención de Truman?**

Truman, presidente dos Estados Unidos, formulou este concepto diante do Congreso do seu país, que supuxo un cambio notable na política exterior estadounidense: toda nación que manifestase o seu desexo de liberdade fronte a un réxime totalitario recibiría axuda norteamericana.

#### **3) Que significa a coexistencia pacífica e cando se da?**

Dáse no período entre 1958 e 1975. Significa o cambio de actitude dos novos dirixentes da Unión Soviética e Estados Unidos, que se presentaron cunha actitude máis tolerante cara as diferencias ideolóxicas e recoñeceron o reparto das respectivas áreas de influencia. Tanto Kruschev (ruso) como Eisenhower (norteamericano) expresaron a necesidade de establecer un diálogo entre Estados con réximes diferentes.

#### **4) Que é o movemento dos países non aliñados?**

É un movemento dos países que formaron Estados resultantes da descolonización. Estes países negáronse a aliñarse con algún dos bloques e quixeron converterse nunha alternativa, defendendo a neutralidade nun primeiro momento e mais adiante, a necesidade de promover unha nova orde económica mundial, baseada na cooperación internacional e na axuda dos países mais desenvolvidos.

#### **5) Que é a *Ostpolitik*?**

É a política exterior de Alemaña federal seguida a partir de 1970 por Willy Brandt que se concretou no inicio de conversas coa URSS e Polonia, recoñecendo as fronteiras establecidas tras a Segunda Guerra Mundial; no recoñecemento da división de Alemaña e nunha aproximación á República democrática no establecemento de relacións normalizadas entre as dúas Alemañas e que deu como resultado que ambas fosen admitidas na ONU en 1973.

**B) Elaborar un pequeno texto que teña rigor histórico e lingüístico cos seguintes conceptos:**

**1) Telón de acero – Guerra fría- Mundo bipolar**

Europa en 1946 estaba dividida en dous bloques mediante o que Churchill chamou un “**telón de acero**” entre o leste e o oeste, e as relacións entrambos eran de **guerra fría**, ou sexa de equilibrio de terror o que obrigou a todos os países a elixir un bloque nun **mundo bipolar**.

**2) Plan Marshall- Atlantismo- zona occidental de Alemaña**

O **Plan Marshall** foi un programa de axuda económica norteamericana a Europa que reforzou os lazos entre as dúas beiras do Atlántico, o chamado **atlantismo**, e incluíu na axuda á **zona occidental de Alemaña**, pasando de ser unha zona ocupada a ser unha zona aliada.

**3) OTAN – Forza nuclear – Carta da ONU**

A **OTAN** formada polos representantes de 12 nacións en 1949 foi unha organización de cooperación militar baixo o predominio político e militar de Estados Unidos que tiña unha decisiva **forza nuclear** e que naceu en medio das fortes protestas soviéticas, denunciando o incumprimento da propia **Carta das Nacións Unidas**.

**4) Norte de Corea- Paralelo 38º- Política de contención**

Coa derrota de Xapón, o **Norte de Corea** foi ocupado polas tropas rusas e o Sur polas tropas americanas, a partir do **paralelo 38º**. Stalin animou aos seus aliados a invadir Corea do Sur para unificar o país e Truman decidiu aplicar en Asia a súa **política de contención** do comunismo, enviando un exército baixo o pavillón das Nacións Unidas.

**5) Política de “Nova Fronteira”- Carreira de armamentos- Acordos SALT**

A **política de “Nova Fronteira”** de Kennedy significou orientar a política exterior norteamericana hacia a cooperación económica e técnica, iniciando o diálogo entre potencias para frear a **carreira de armamentos** dando como resultados da distensión entre os bloques o asinamento en 1972 dos **acordos SALT 1** (*Strategic Arms Limitation Talks*) que limitaban o aumento das armas nucleares.

**C) Indicar concepto, país ou persoa á que se refiren as seguintes frases:**

- 1) Da Segunda Guerra Mundial saíu moi engrandecida e os seus dirixentes iniciaron un proceso para facer da súa zona de ocupación en Europa unha única rexión integrada: **A Unión Soviética**
- 2) A formación dun Estado alemán occidental logrouse nos acordos de Londres en 1948 entre as tres potencias ocupantes: **Estados Unidos, Francia e Gran Bretaña**.

- 3) Kruschev propuxo converter a Berlín en cidade libre desmilitarizada, proposta rexeitada polos occidentais e a República democrática para frear o éxodo masivo cara ao Oeste en 1961 respondeu levantando: **muro de Berlín**
- 4) Estados Unidos consideraba que en Vietnam se xogaba a carta da expansión do comunismo internacional representado polo movemento guerrilleiro: **Vietcong**
- 5) A comezos dos anos 70 as dúas superpotencias perderon influencia e ademais habería que ter en conta agora os seguintes países: **China popular, Europa Occidental e Xapón xunto ao Terceiro Mundo.**